


Celia Thiel:

‘Kico a pasa riba 5 di februari 1971?’

ORANJESTAD - Na 1971 a tuma luga e prome competencia di tumba na Wilhelmina Stadion awe (Stadion Guillermo Prospero Trinidad). Di cuminsamento, tumba a wordo toca na e clubnan social pa celebra carnaval y despues a toca tumba den parada di carnaval. Tur esaki, prome cu musica di steel, esta steelband.

E aña aki ta e di 50 biaha cu ta organisa e competencia di tumba y 2021 ta 50 aña.



- E prome Rey di tumba tawata: Hyacinto (Cassin) Giel, cu a canta e tumba; “Temporada di Carnaval” componi pa Donny Geerman y compaña pa Super Combo Casino.

- Di dos a sali: Cecil Growell, cu e tumba: “Jump up mi Shonnan”, componi pa Bernadina Growell-Kock y compaña pa Sensacion del Caribe.

- Di tres a Sali: Tom Delaney, cu e tumba: “Bon Carnaval” componi pa Hector Hasham y compaña pa



Hasham y sus Diamantes. Den tur e 50 biahnan cu a pasa, tin hopi esfuerso di: organizado, compositor, arreglista, cantante y bandanan. Ta importante pa realisa cu tin mas cu 500 composicion di tumba y di e prome Reynan di tumba di añanan 70, ta e prome Rey di tumba Cassin Giel so, ta na bida. Cassin ta cantante y compositor. Richard (Tattoo) Quant ta e unico cantante cu ta: Rey di tumba, Rey di calypso y Rey di roadmarch.

E cantantenan di tumba ta participa den competencia di calypso y di roadmarch, mustrandu asina nan calidad artistico riba e cantantenan

di habla Ingles. E ultimonan aki ta limita na calypso y roadmarch so. E bandanan manera otro: Sensacion del Caribe, Impacto Musical y Musical Time, a compaña cantantenan di: tumba, calypso y roadmarch (entre otro Lord Boxoe, Chicho Kock) durante basta aña. E cantantenan di tumba ta mas reparti riba e districtonan di Aruba, cu e cantantenan di calypso y roadmarch, p’esey nan voz mester ta mas fuerte. E crecimiento aki ta bisto den e hobennan cu ta participando den tumba, calypso y roadmarch y cu ta biba den diferente districto di Aruba.

Ta tempo pa reconoce tur es-

unnan cu a aporta na competencia di tumba den tur forma y esunnan cu fuera di tumba, a demostra nan talentonan den calypso y roadmarch.

Mester realisa, cu carnaval no ta exclusivamente di San Nicolas y di gobierno. Tur districto di Aruba tin nan historia organisatorio, musical, creacion artistico, participacion di reina, prins y pancho. Den e organisacion actual, no tin representacion di tur e areanan aki.

Respet pa nos Tumba ta un mester. Aceptacion y reconocimiento di nos historia manera cu e ta, ta muestra di integridad.